

欽定剿平三省邪匪方略

欽定剿平三省邪匪方略正編卷三百七

壬戌年

三月十五日

臣

德榜奏言

臣

前在雲奉交界

之鳳凰頭大山將線字號餘匪襲其堯李世漢等剿盡後督兵西趨嗣據哨探雲陽之馬槽壩大水田有賊一股人數較多當卽督兵由上三壩自東北向西南進剿因沿途時有零匪出沒正可隨時搜捕當派副將達白祥叅將何君佐

走沙陀子黃沙溪前進叅將馬應國遊擊馬文
斌由高峯觀前進叅將張應貴遊擊楊登魁向
萬家坪傅家壩前進各帶兵勇四五六七百名
不等概用藍白布包頭打豎賊匪旗號不帶鍋
帳各裹口糧分路搜捕臣督率豐紳達勒精阿
色爾滾武隆阿馬瑜等於三月初三日行至開
縣之高陽河達白祥馬應國張應貴等帶兵前

後來營據達自祥面稟行至雙河口見黃沙溪
一帶有零匪四五十人令兵勇前往合夥該逆
正在游移間我兵猝加擒剿拏獲活賊蕭士緒
等十三名割獻耳級六副據張應貴解到王三
槐之弟王三林王三槐之姪王世愷王世元並
活賊張順等二十六名呈繳耳記二十一副又
據馬應國等拏獲活賊張啟發等二十一名繳

到耳記十八副共繳刀矛旗幟一百餘件問據
蕭士緒供稱係青號餘匪共有四十餘人並無
頭領總在雲陽開縣山裏摸樁掠食今日見是
我們的人來要去合夥不料是官兵把我們擒
殺又據王三林供係王三槐堂弟哥子王三茂
姪兒王世元王世愷自從王三槐被官兵拏獲
送京後我們叔姪四人先隨冷添祿又隨符曰

明到處竄逸他們被官兵殺了我們帶有七八百人各處擄掠屢被官兵剿殺如今只有七八十人不想官兵假扮我們的旗色到此就殺起來又據張啟發等供係藍號陳自得的人被官兵連次剿殺只剩三百來人又合上白號田姓一百多人走到梁山忠州被官兵連次剿殺只剩得一百七十八人想仍到湖北去躲避官兵

搜進山來將我擒獲各等語查此次三路搜捕
共擒活賊七十三名呈獻耳記四十五副訊明
後卽將王三林鬻割示衆其王世愷王世元並
蕭士緒張順張啟發等六十五名一概正法其
有附近被擄難民鄭家貴等八名卽行釋放隨
據探報白號張姓賊匪於初四日尙在四十八
槽之椒子坪上墳掛青初五日已向萬縣逃竄

臣於初四日五鼓發兵趕至萬縣之牛心寨探

得該匪已向周家營一路奔竄距臣軍營六七

十里隨令豐紳武隆阿等督同侍衛喜明總管

富僧額副將鄭啟貴等帶領兵勇二千餘名由

東壩廠會家山右手進發臣督同達勒精阿色

爾滾馬瑜等帶領兵勇二千餘名由大地坪鐵

風山前進均於二鼓發兵不料該逆先已起營

官兵冒雨跟追至大水溪八角崖牛鼻子趕上賊尾分投衝殺賊衆爲雨淋漓各不相顧四散奔逃立斃賊匪八九十名生擒徐盛安李邱氏等男婦一百四名口又復力追四十餘里至千秋塆沿途又殺賊二三十名生擒陳開宗等二十三名口時已天晚各溪山水漲發餘匪捨死撲河淹斃者實復不少遂翻東嶽山桐草支一

帶逃竄此次原擬竭力掃除此股餘孽不料雨
大路滑未能痛加剿洗查此路左通萬縣右走
開縣訊據獲犯徐盛安等供稱此股係白號張
長更之兄張長青弟張長生爲首要走大寧奉
節一帶西逃等語訊明後將戰手陳開宗等八
十三名卽行正法其餘徐盛安李邱氏等四十
四名口多係巫山巴東難民均按名給予銀米

路票遞送原籍查總兵田朝貴等所剿張添倫
魏棒棒二逆均已殲斃尙有頭目顏中考帶領
餘匪奔逃復被道員劉清截剿約剩二百餘人

臣當飭令將張魏二逆首級就近解交勒保查

驗具報並飭該鎮乘勢趕剿務將張魏餘孽悉
數掃除不可去而他顧其張子聰一股四五百
名近據太平文武稟報在城口老山一帶游奕

此外川東川北已無成股之賊所有零匪亦不
過數十人至二三百人現有勒保豐紳溫春蒲
尙佐張志林田朝貴劉清等分投剿捕自必易
於辦理至臣現追之白號張長青賊股原有一
千數百人昨被探剿及淹斃渙散外只餘七八
百人臣惟有趕緊剿殺一俟掃除後卽當移師
東下巫巴冀與楚兵兩面夾擊使各逆不致有

深入川東之患再

臣

昨將線字號一股首夥餘

匪全行擒殲生擒首逆李世漢李國珍父子及
頭目唐大高余佐志等各犯均係起事老賊而
又在楚日久必知其詳細加研訊據供樊人傑
等以南岸尚有伏而未起習教之人曾商同各
號欲乘空搶船渡江因大兵到來纔分開逃走
訊以各股賊情又稱白號崔胡戴四黃號王曾

等股共有四千餘人黃號樊人傑亦有千餘人
與白號時分時合藍號蒲添寶一股係湊合陳
朝觀之子併王四猫李彬的餘黨共有二千多
人青號王山併徐添德餘匪如今亦有二千多
人黃號龍紹周的賴先鋒劉總兵只有四五百
人總在歸巴興房老山往來臘月正月都在火
峯界嶺及萬流江邊一帶後聞將軍帶兵要來

纔又分散等語

臣

查該逆等所供楚境各匪數

目幾及一萬實難憑信是以摺內未敢遽行聲

敘頃據密差探報楚省之王曾桂胡戴樊各逆

現有官兵跟剿東下惟探有監號蒲添寶一股

賊匪二千多人已由歸州東竄其餘賊匪俟探

確再爲稟報查前次李世漢所供經

臣

截回三

起賊數併賊首名目及現查出之蒲添寶賊股

核對均亦相同則其餘尙未探明者亦未必無
因緣興巴地方在在老山箐林各逆屯踞其中
差探之人祇據逃出難民或拏獲一二賊匪所
言半多不實常有不知賊數多寡爲首姓名者
至於南岸情形遍訪雖有傳說究無形迹固不
可稍涉張皇亦不可置諸意外自應持以鎮靜
不露端倪預爲密籌先將北岸賊衆掃淨則南

岸卽有未萌遺孽亦可潛消默化矣奏入

上命軍機大臣傳諭德楞泰曰此次德楞泰分派將
領搜捕各處零匪多有斬獲所剩不過數十人至
二三百名不等現有勒保豐紳溫春蒲尙佐張志
林田朝貴劉清等分投追捕無難一律掃除惟白
號張長青一股尙有七八白人賊數稍多德楞泰
務須乘其敗竄之時上緊截擊尅期殲淨則川東

川北卽可全境肅清彼時德楞泰再酌量情形探
明楚省賊蹤何處緊要卽移師前往會剿以期迅
速蒞事又另奏訊據獲賊供稱現在楚省南岸尙
有傳習邪教伏而未動之人商同各號欲乘間搶
船渡江後聞大兵到來卽分散逃走等語此等習
教未動匪徒原難保其必無亦不獨湖北爲然此
時唯有隨時隨地遇賊卽剿果能將成股之賊悉

數殲除其餘伏而未動者自必聞風震懾不敢再行勾結矣

上又命軍機大臣傳諭吳熊光曰本日德楞泰奏訊據獲賊李世漢等供樊人傑以楚省南岸尚有伏而未起習教之人會商同各號欲乘空搶船渡江會合後聞大兵到來卽分散逃走又有藍號蒲添寶一股湊合陳朝觀之子併王四貓李彬餘黨共

有二千多人白號有四十餘人黃號有千餘人青
號有二千多人合計竟有萬餘等語此等獲犯所
供固不可盡信然亦未必無因楚省亦有現獲賊
犯何不向其詳加研鞫自可以得其梗概即使南
岸果有伏而未動之賊亦應持以鎮靜密爲防範
如能於北岸賊匪悉力殲除將樊人傑等按名擒
獲其伏匿未起者自必聞風震懾默化潛消吳熊

光務當隨時留意相機籌辦其監號蒲添寶現與
陳朝觀之子等合夥已有二千餘名吳熊光係該
省總督何以總未曾據伊奏過現在樊王崔胡戴
各股賊數究有若干并百查明速奏

十七日

丁亥

吳熊光奏

臣

欽奉

上諭昨全保一路總兵王懋賞等同時陣亡十四人
恐帶兵之員現不敷用吳熊光或咨商王柄於湖

南鎮協營弁中遴選勇敢之員前赴湖北軍營若楚省兵力不足亦應於湖南各營就近酌調等因

臣

查楚省兵力本遠遜於川陝以現有兵力而

論實覺不敷分撥惟隨征官兵必須技藝嫻熟曾經行陣者方能剿捕得力查湖南一省惟苗疆各營官兵素稱熟練但苗疆重地亦不便調派而下游各營官兵除留防苗地外其餘節次

調赴川陝湖北剿捕教匪現在存營兵數無多
且半係新兵於剿捕斷難得力是以臣前次

奏請將現在川陝剿賊之湖北湖南官兵二千餘
名調回湖北軍營已荷蒙

允准諭令額勒登保將苟逆辦完之後卽先將湖北
湖南官兵撤回楚省目下追剿苟逆正當喫緊
之際臣惟有與全保長齡儘現有兵力督飭鎮

將趕緊剿辦斷不至稍有鬆勁第近來賊情愈形狡詐而帶兵鎮將必得久歷戎行胸有成竹之人方足以制賊查楚省總兵孫清元吉林泰雖打仗屢有擒獲尙知奮勉但總未能擒渠掃蕩痛加剿戮此外副將中如李天林樊雄楚蔣觀濤皆能訓練士卒整飭營務卽帶兵打仗亦尙知勉力而於一切臨陣機變未能深通此時

楚省必得素有勇畧之提鎮一二員幫同剿辦
方可得手查有山西太原鎮總兵穆克登布現
在陝省平利縣帶兵堵禦相離楚省竹谿一邊
之隔聞該鎮勇幹有爲屢次獲勝可否仰懇

聖恩卽以穆克登布調補湖南永州鎮總兵并令統
率所帶官兵就近先赴楚協剿實可易於集事
其所遺山西太原鎮總兵員缺或卽於李天林

樊雄楚蔣觀濤二員內

簡放一員仍暫留楚省帶兵或另行

特簡之處恭候

欽定仍俟額勒登保將湖北湖南官兵撥歸楚省

臣

卽將穆克登布所帶之兵撤回陝西一轉移間

兩省剿辦均可不致掣肘再王曾樊崔等逆前

經官兵在房縣東浪地方打散後卽向西路二

竹一帶晝夜狂奔行走甚速撫臣全保提臣長齡馳往竹谿截其去路總兵孫清元吉林泰由二竹之郭家洲抄赴西南以期兩面夾擊詎賊情詭詐見我兵分路兜剿亦卽分爲兩股由竹谿之水坪竄往南山萬家河黃柏溪泉溪等處四散奔突希圖牽綴官兵現在全保長齡孫清元等俱已追往剿辦至前由川省巫山竄入巴

陸世元前在東湖縣霧渡河打仗身受矛傷十
六處茲醫治無效因傷身故奏人

上命軍機大臣傳諭吳熊光全保長齡曰樊人傑一
犯係積久著名首逆最爲狡猾可惡必須迅速殲
擒吳熊光當轉催全保長齡等上緊截擊不可稍
有延緩又據奏竄入興巴之冉井等逆人數亦復
不少已派孫應奉蔣觀濤帶領兵勇一千五百名

前往截剿此股賊數旣多恐孫應奉等所帶兵力未免稍單惟當令其併力堵禦勿令賊匪深入俟全保長齡等將樊人傑等大股剿辦得手或酌分一人帶兵前赴興巴督同孫應奉等剿辦冉井等逆自無難迅就掃除至所稱現在湖南存營之兵半係新兵剿捕難期得力且湖南係苗疆重地該處官兵不便輕爲調派所見甚是其現在陝省剿

賊之湖北湖南隨征官兵額勒登保自必酌量情
形將此項兵丁迅速遣回吳熊光惟當就現有兵
力督率剿辦不可少有鬆勁其請將穆克登布調
補永州鎮總兵一節所奏亦是楚省帶兵鎮將現
在乏人穆克登布打仗奮勇屢次立功朕所深知
永州鎮管理苗疆必須勇幹有爲之員方足以資
彈壓穆克登布著調補湖南永州鎮總兵其所遺

山西太原鎮總兵員缺將副將李天林補授穆克
登布現在川省邊界防堵如此時並無專辦之賊
卽令其迅速赴楚幫同剿辦自更得力其守備陸
世元前因打仗身受矛傷十六處甚爲奮勇已加
恩以都司陞用茲因傷發身故著卽照都司陣亡
例賜卹

十八日

戊子

額勒登保奏言查苟文明股匪由白

雲峽竄往太白梁

臣

令札克塔爾等由辛峪口

入山赴寬河厚畛子向南進擊令楊遇春等帶

兵由磨房溝雞公梁繞赴黃柏園進剿並派將

弁由白雲峽太白梁緊躡賊蹤而進旋據該將

弁等報稱峽內路徑險阻

臣

卽親帶官弁兵勇

徒步進發該處兩山夾峙一線蜿蜒且木石縱

橫兵勇等猱升魚貫而進自己至申行走二十

餘里於松灣暫行駐紮次日黎明時據前隊兵
勇捉獲落後賊匪數人訊知賊衆已翻過太白
梁出楊泗廟現由老營翻越大山向東南而去

臣思賊蹤既相距已遠我軍自不必尋蹤而前

且恐札克塔爾楊遇春兩路官兵由東西兩面
兜截該匪又竄往北面峪口是日復接惠齡來
信未李昭匪由棧東竄往山坪恐其深入甘境

已帶兵由寶雞進剿是惠齡既已西去北面又

屬空虛

臣

遂卽將兵勇撤至湯峪口初三日由

郿縣之遠門盤屋之辛峪口而進於初五日抵

黑水峪賊匪經兩路官兵兜截已由大光溝向

東南逃竄扎克塔爾由玳瑁河黑河橋顧東抄

截楊遇春由都督河三岔河跟蹤進剿

臣

因賊

匪既向東剿無須在峪外抄截隨卽由黑水峪

入山連日由黃草坡小王澗秦嶺火地柴家關
一帶翻山越林兼程而進初九日進抵魚洞子
十一日抵楊莊河據楊遇春李應貴及各路將
弁等報稱初六日帶兵追賊至藥扒官溝河一
帶賊匪正在該處圍攻寨砦卽率兵奮擊斃賊
二十餘名該匪四散竄入林箐次日復令官弁
兵勇跟蹤搜捕該匪一見官兵又佔據菜子坪

山梁憑高抗拒我軍正在奮力進攻突有一股賊匪約四百餘人由密窩子竄來搶佔左溪山梁楊遇春一面率同侍衛傅陞副將應元寬等攻剿菜子坪賊匪一面令總兵李應貴侍衛噶拉等分帶官兵迎剿左溪山梁賊匪天色將晚楊遇春等將菜子坪賊匪剿潰殺斃二十三名生擒八名追趕二十餘里賊匪遁入月亮坪老

林李應貴噶拉等一路亦殺賊十餘名生擒五
名賊亦潰敗竄入老林是夜與苟逆合夥向東
逃遁查得由窑窩子竄來賊匪係宋李二逆自
棧西安溝竄至牛尾河華陽叅將張汝勤在黃
柏園堵剿聞信卽分派弁兵赴大小澗溝攔截
都督河之路張汝勤並親帶兵勇於初七日趕
到華陽乃該匪已於初六日竄過華陽與苟逆

合爲一股次日扎克塔爾格布舍等亦帶兵由
兩岔河趕抵三官廟兩路官兵會合籌剿慶溥
於初九日趕到華陽亦帶兵追剿而來臣現又

飛飭楊遇春扎克塔爾慶溥等務乘賊匪竄合

我軍相距不遠之際緊顧秦嶺併力合剿臣卽

帶兵由兩關河金家坪進發督催趕辦查探山
內各股零匪據報一股約七八十人由老莊竄

往滂峪腦又有三四十人由太平寨一帶游奕
自卽係劉永受賊匪經總兵楊芳帶兵搜剿零
星奔逃此外別無賊蹤是現在南山以內苟張
朱李及劉永受各股賊匪共計不過一千六七
百名臣已飭令楊芳將劉永受賊匪趕緊搜捕
聞惠齡現亦由東河轉至田峪一帶增剿顧住
平原更可就近督率卽日肅清再川境剿辦張

魏賊匪之守備郭大朝於二月初九日在東鄉
縣長吉溪接仗猝中賊矛陣亡又守備歐愷於
十三日追賊至平茅壩未等兵勇到齊卽衝入
賊羣手刃二賊亦被矛傷殞命

同日慶成奏言

臣

因苟逆賊匪距棧較遠本擬

卽於沔畧之間偵蹤拒截行至畧陽屬之黑河
壩忽聞有川匪一股由漢南地方晝夜偷竄入

陝初五日已過銅駝老龍池等處距沔寧大道

不遠

臣

聞信卽刻趕出沔邑之銅錢壩蔡壩一

帶分撥兵勇迎往棧東邀擊途次據探差回報

川匪有一三百人於初七日寅刻自寬川鋪偷

過棧西在南沙河民屋內造飯卽飛檄派往棧

東兵勇折回西路抄迎截剿

臣

一面帶領馬隊

追蹤前進至寧羌州屬麻柳壩正遇賊匪蜂擁

前奔臣率領馬隊直前衝殺射斃二十餘賊該

匪翻越數重大山衣帽器械大半丟棄被裹民

人全數落後乘機投出臣祇帶馬隊追殺不暇

詳詢察其情詞多係陝民俱令各自回家仍卽

督兵窮追七八十里人馬竟日未停甫欲暫紮

探聞該匪西竄在黃家灣地方藏匿距陽平關

僅二十里逼近嘉陵江臣隨鼓勵弁兵又趕至

黃家灣賊匪紛紛逃散_臣指撥馬兵分投追殺

又射死賊一二十人擒獲僞先鋒周良玉等九

名時已戌末難以搜捕慮該匪深夜繞奔陽平

關一帶偷渡該處弁兵防備不及復帶馬隊赴

關查探殘匪不滿百人折竄畧陽地方初入日

五更_臣帶兵抄至二郎壩探聞該匪奔入寧畧

交界之插臺山塔佛寺一帶老林並無走馬之

路適步隊兵勇自棧東調回趕來卽令裹帶乾糧分投入林搜捕期於速就殄除不致蔓延訊問僞先鋒周良玉供稱湖北襄陽縣人前在高家營充當矛手上年八月間高二被官兵捉去卽歸入張添倫卽張二彪子之夥現係魏洪升管事本年二月要過陝西因聽得各營卡狼緊有先鋒丁佳蘭原在白河縣住家熟悉陝西道

路與喬先鋒商量叫我一同充當先鋒帶陳戰
手一百五六十人夜間走路沿途又擄得一百
多人共有三百餘人初六日由寬川大道走至
南沙河不料馬兵殺來他們散跑將我拏住等
供當將該犯及陳矛手擣割梟示並嚴飭沿邊
各卡確探川境竄匪蹤跡臣一得竄近陝邊信
息仍帶兵馳往截剿均奏入

上命軍機大臣傳諭額勒登保慶成曰本日額勒登保遞到六百里奏報仍不過分路追剿賊匪情形並未將苟張宋劉等各首逆殲擒一名而額勒登保親帶將弁兵勇徒步進山自巳至申僅行三十餘里該匪早已翻越大山向東南逃去不見一賊而回徒勞何益卽楊遇春等所殲零匪數十名不過落後疲乏之賊似此逐日攀援何時始能剿淨

所辦實不妥速甚不愜意據稱共計賊匪祇有一千六七百名而各路官兵十倍於賊自無難克日殲除但額勒登保與楊遇春等惟事入山搜捕輾轉奔馳徒疲兵力殊屬非計譬如狐鼠必須熏令出洞方能乘勢掩捕豈有入穴搜尋之理況賊匪斷不能久住山內必仍思出外掠食額勒登保當一面設法轟逼一面派令將弁於賊匪出入必由

各要隘預先埋伏爲迎頭截擊之計庶以逸待勞
可期事半功倍又據慶成奏探得川匪二三百人
自寬川偷過棧西卽帶領馬隊前往截剿先後殲
賊三四十人該匪竄入寧畧交界老林現派兵勇
入山搜捕此股散竄賊匪雖經慶成截回但尙在
寧畧一帶山內藏匿難保其不復行竄出慶成仍
當在陝境邊界留心防堵不可稍有鬆懈並著額

勒登保將苟宋等逆速行辦竣後酌分兵力前往
寧畧一帶幫同慶成剿辦零星匪以期陝境一律肅
清再此次由川竄入陝境賊匪據慶成所奏情節
係黑夜潛行偷越營卡該處疎防之員情尚可原
及竄入漢南寧沔一帶總兵永明及防堵各員均
未奮力截殺實有應得之咎並著額勒登保查明
據實叅辦

欽定剿平三省邪匪方略正編卷三百八

壬戌年

三月二十一日

辛卯

德楞泰勒保奏言查白號張

姓股匪

臣

德楞泰督率官兵在大小溪牛鼻子

等處大加剿洗餘匪尙剩七八百人向東嶽山

桐草寺一帶奔逃有竄走開縣之勢當派豐紳

達勒精阿武隆阿帶領官兵跟蹤追躡

臣

德楞

泰督同色爾滾馬瑜帶兵繼進該匪被追情急

蓋夜狂奔直竄至開縣所屬兩河口一帶其時

臣勒保正由新寧移師東來探聞此股賊匪竄

近當卽派令總兵田朝貴叅將張明德遊擊羅

思舉薛陞王忠桂等帶領備弁兵勇迎頭截擊

臣勒保亦繼進策應初九日田朝貴等師次瓦

子坪探得賊匪正在乾溪溝何家溝一帶分紮

與我兵相距不遠田朝貴等卽帶兵連夜前進

次日黎明行抵該境賊匪尙未起竄田朝貴當
將官兵分路兜剿遊擊薛陞王忠桂帶領兵勇
在左邊山坳埋伏叅將張明德遊擊羅思舉守
備劉寶元帶領兵勇由右邊山梁橫截田朝貴
親率都司馬建廷守備鍾廷孝帶領兵勇由正
路直下衝殺該匪見官兵猝至驚慌奔竄兵勇
奮力圍剿立斃賊六七十名該匪向左邊山梁

逃竄經薛陞王忠桂等從山坳衝出迎頭截住
復斃賊三十餘名生擒四十餘名該匪折回右
手山溝又被張明德羅思舉從山梁下壓該匪
亡命奪路我兵前後圍殺復斃賊一百餘名生
擒一百餘名餘匪分作六七股或向東鄉所屬
之紅沙嶺葫蘆壩或向開縣所屬之楠木洞機
坪壩等處四散逃竄我兵分路追剿三四十里

五六十里不等沿途擒斬甚多至晚收集兵勇
查點共殺斃賊二百餘名生擒三百十四名口
內有偽總兵王學貴趙臣選二名旗手李先志
等八名其餘或係戰手或係難民均暫交開縣
收明聽候審辦搶獲賊旗三十一桿烏鎗二十
二桿長矛三百四十桿騾馬三十六頭匹餘匪
約尙有三百人現在分投散竄_臣等已飛札該

鎮等仍卽探蹤追捕以期迅速殲淨至雲冲阿
溫春蒲尙佐等前在溫湯井一帶正在探剿陳
自得餘匪適有白號張簡一股從竹峪關竄至

太平東鄉一帶經

臣

勒保督同總兵田朝貴等

在老君場等處剿敗後餘匪四五百人由楊柳
關天池寺等處分路奔竄雲冲阿等聞信當卽
就近分兵迎剿賽冲阿帶領馬隊從新寧取道

抄截溫春蒲尙佐帶領馬步官兵向東鄉一路
探剿初二日酉刻溫春蒲尙佐等行抵上八廟
地方賊匪正在山梁高處望見官兵前來卽連
夜折向三匯口雙河口一帶奔逃官兵緊躡追
剿向雞公嶺平頭山涼垭子等處緊追兩晝夜
直追至侯家院該匪被兵追急分作二股一股
約一百餘人左竄柏木園一股約三百餘人右

竄魚鰕溝溫春以右竄之賊較多卽督兵間道
抄出鐵爐溝趕及賊蹤該匪搶佔梓潼廟山梁
溫春等當將兵勇分作三路蒲尙佐率領叅將
沈洪遊擊賀廷印等帶兵由左手山梁迎截副
將馬元叅將李東山等帶兵由山下仰攻溫春
帶領侍衛富森德協領明德遊擊楊森曾受抄
出賊後兜擊三路官兵鎗箭齊發立時斃賊二

三十名賊匪翻山向靈官廟大龍門添樹溝等處分投逃竄我兵四路追捕復斃賊四十餘名生擒二十三名奪獲賊旗刀矛等件至晚回至梓潼廟暫紮查訊活賊內有僞千總戴光月旗手黃盈松探馬頭李光華莫老么及戰手林清等共九名當卽正法其餘難民袁文儒等十四名訊係脅從未久解交開縣遞籍餘匪四竄溫

春蒲尙佐等現仍探蹤進剿維時

臣

德楞泰與

豐紳達勒精阿武隆阿追剿白號張姓賊匪已

至開縣所屬南埡場

臣

勒保亦督同田朝貴等

迎擊此股賊匪前來查該匪既經官兵分投痛

加斬獲剿剩餘匪現仍飭田朝貴等緊躡搜捕

臣

勒保與

臣

德楞泰師行相近正當彼此會合

將川省現任賊勢兵力通盤籌畫分佈剿辦并

將一切應辦事宜公同會議定局是以於初十日在南埡場相約會合籌議各事另行恭請

聖訓

德楞泰勒保又奏言查川省現有之賊如白號

張長青一股經_臣德楞泰自巴東截回疊經官

兵痛剿所剩餘匪三百餘人其凍自得餘匪經

賽冲阿等剿洗後約剩一百五十人已與張長

青一股合夥又張簡一股前自竹峪關竄來經官兵連次截剿亦約剩四百餘人又宋國品一股約剩二三百人以上四起均在東開一帶分竄又張魏餘黨顏中考魏洪升一股經田朝貴剿敗後所剩亦不過一二百人現在南江境內此外零星散匪自一二十人至百十人藏匿各處山林出沒無定者尙有數起統計川省現有

之賊不及三千人均須分投剿捕以期淨盡此

時臣德楞泰既欲督兵赴楚則臣勒保必須兼

顧川東川北現在豐紳巴與臣勒保會合一路

薛大烈張績亦經經畧額勒登保遣令帶兵回

川原任提督七十五及伊子武隆阿現在臣德

楞泰一路臣等通盤籌議夔門爲川楚門戶巫

山大寧與楚省之巴房二竹處處毗連臣德楞

泰帶兵過楚後恐各匪被剿情急折入川境必
須於邊界預爲設備堵截查七十五在川年久
於川東地勢最爲熟悉且兵勇素所悅服其子
武隆阿向來打仗奮勇_臣等現今七十五武隆
阿率領兵勇在巫山大寧邊界往來巡哨既可
就近搜捕各處零匪設楚匪被剿竄川卽可就
近迎截夾擊至川北張魏殘匪現經_臣勒保派

令遊擊馬績恒慶會同建昌道劉清各帶兵勇
趕緊搜捕諒不日自能殲盡但該處界連陝境
恐尙有餘匪竄逸川北未便空虛查豐紳爲本
省提督向在陝境帶兵曾至川北剿賊於地勢
較爲熟悉臣等卽令豐紳酌帶兵勇前赴川北
於廣南通巴等處往來巡防以顧川省西北臣

勒保將薛大烈田朝貴張績張志林等所帶官

兵分作數路在東鄉太平開縣雲陽萬縣等處

一面將現有賊股分投剿辦一面將零星散匪

隨地搜捕臣勒保卽在各處往來督催旣可將

腹地趕緊肅清又可兼顧川東川北邊界設再

有另起竄匪來川當酌量情形賊少則分兵迎

剿賊多則合兵併擊臨時相機辦理至臣德楞

泰現擬赴楚該省賊勢較重必須多帶馬步官

兵并得力之統兵大員前往方能集事

臣

德楞

泰一路官兵惟吉林索倫馬隊最爲得力吉林

官兵向係賽冲阿管帶深得兵心人皆用命此

時陝省賊數無多有經畧額勒登保在彼督辦

軍威已極壯盛賽冲阿似可不必急急回陝至

溫春蒲尙佐亦均係

臣

德楞泰一路向來帶兵

得力之員茲將軍賽冲阿溫春蒲尙佐等並原

帶馬步官兵一併仍歸臣德楞泰一路赴楚剿

賊入楚後設將大股賊匪截入川境自應跟剿

回川倘深入楚境另有賊匪分股竄川臣勒保

當酌量分兵辦理至於臣等前此會議於巫山

之大昌大寧之徐家壩太平之城口通江之竹

峪關廣元之黃楊堡五處添設營制業經奏蒙

恩允在案所有各營汛衙署兵房爲官弁辦公及兵

丁棲止之所須派承及文員估計工程及時建造

臣

等公同商議所古有大昌營汛派委夔州府知

府方積承辦徐家壩營汛派委候補道府鄭成

基承辦城口營汛派委候補通判李在文承辦

竹峪關黃楊堡二處營汛派委建昌道劉清承

辦惟新設各營皆在沿邊荒僻之地營制雖設

若無城堡不足以資捍衛查廣元所屬百丈關

也方昨經額勒登保親履相度地勢最爲扼要
飭令該署縣葉文頤改築立城堡刻下業已完竣
該處與黃楊堡相近十餘里且舊有巡檢一員
分駐所有新設黃楊堡一營請卽在百丈關堡
內建造毋庸另行築堡其餘大昌徐家壩城口
竹峪關四處應築城堡卽令承辦營汛各員一
併估計卽日興工建築一俟軍務蒞事新設各

營官弁兵丁皆得棲止卽可歸汛操防至於各
營新設兵額原擬以隨征鄉勇儘數挑補但恐
鄉勇不諳營制一時驟難鈴束臣等擬將兵勇
對半搭配如城口都司應設兵額四百名卽以
二百名挑補鄉勇以二百名將太平營舊有制
兵就近撥補所遺制兵名糧卽以額外新兵頂
補其餘大昌徐家壩竹峪關黃楊堡四處均照

此一律辦理如此既可裁減新兵額缺又可使
入伍鄉勇有所幹束漸習營規此外尙有隨征
鄉勇請仍照前奏章程俟大功告竣後有願入
伍者分撥通省各營作爲餘丁以次充補亦無
難安頓得所

勒保又奏言竊

臣

恭奉

諭旨該省民人續輸津貼銀一次以備賞需急公可

嘉著查照上年恩旨再將此次捐輸津貼各州縣
應征地丁錢糧奏請分別蠲免以示獎勵竊思川
省續輸津貼一項百姓自切同警之誼分所當
然茲復叨荷

聖慈嘉其急公之義闔省紳民益深感戴

臣

謹將辦

理津貼各州縣分別銀數多寡繕具清單恭呈

御覽

同日吳熊光全保長齡奏言據探報王會樊崔等匪合爲兩股一由朱家溝一由桐柏溝俱向

西南奔逃時

臣

全保長齡先由簡道池大會灣

抄出賊前該匪探知前面有兵攔截卽折回東路晝夜疾馳於初九日行至竹山官渡河適孫清元吉林泰由郭家洲進發該匪望見官兵卽轉赴南路向西燕溝寶石店一帶狂奔而去孫

清元等緊躡賊蹤兼程追趕初十日晚行抵漳
洛河探知賊匪在於相距三十餘里之褚河屯
紮孫清元等卽於四鼓拔營黎明時將近褚河
據前探飛報賊匪正在分攻雙和天星兩寨勢
甚危急孫清元等當令侍衛特克昇額副將朱
士奉等帶領馬步兵勇由左首溫浴溝往援雙
和寨又令總管托爾托保委總管武成額等帶

領馬步兵勇由右首梨樹溝往援天星寨孫清
元吉林泰各帶馬步官兵往來策應維時圍攻
雙和寨之賊見官兵猝至卽棄寨蜂擁迎撲副
將朱士奉等督率兵勇直前衝擊鎗箭齊發立
斃賊匪四十餘名寨內勇丁出寨吶喊趁勢下
壓官兵益奮力上攻賊匪慌亂四散奔逃朱士
奉等督率兵勇追趕二十餘里沿途又斃賊五

十餘名生擒活賊十七名餘匪由咸池一帶翻
越大山狂奔逸去其圍攻天星寨之賊一見官
兵卽紛紛解圍搶佔左首大山遊擊烏勒喜訥
都司姜元祥等督率兵勇奮力迎擊殺死步賊
七十餘名鎗斃賊十餘名內有執大旗賊口一
名亦中鎗而倒餘逃奔上梨樹灣陡險山梁蟻
聚一處希圖併力抗拒遊擊烏勒喜訥等由中

路奮力仰攻該匪恃險負嵎擲石如雨兵勇間有受傷吉林泰帶領馬隊官兵繞至山後右首馳馬直上孫清元督率步兵由山後左首攀援而登一齊向前衝擊賊匪站立不住卽爬山越嶺四處分奔三路官兵分投追殺計程有四十餘里沿途又斃賊一百餘名生擒活賊四十二名餘匪向廟坪平口河一帶竄去此次兩路官

兵共殺賊二百八十餘名生擒活賊五十九名
逃出被裹難民三十七名其餘沿途散去者尙
復不少搶獲賊旗鎗矛騾馬甚多當於獲犯內
訊出周大興一名係曾芝秀股內僞先鋒朱士
富蔡品貴周福三名係探馬旗手並據該犯等
認出遊擊烏勒喜訥一路鎗斃之執旗馬賊係
樊人傑股內僞先鋒趙名魁餘無要供當將該

四犯一併臠割其餘陶成鳳等五十六犯訊係
積年矛手概行正法逃出難民酌給口糧路票

各予省釋現在孫清元吉林泰卽由瓦房坪一

路蹣跚緊追不予以暇臣全保長齡由雙竹園

曰沙河一帶向南抄截以期夾擊集事至川匪

冉井等逆尙在興山歸州一路往來游奕昨臣

吳熊光

奏明派委副將孫應奉蔣觀濤奏集兵勇前往剿辦可以顧住東面腹地似不敢肆竄滋害堪以仰慰

慈懷均奏入

上命軍機大臣傳諭德楞泰勒保曰白號張姓股匪攷殘奔竄此次復經德楞泰勒保分投截擊殲擒數百名所辦皆好現在川省餘匪不過二千餘人

德楞泰與勒保會商將川省應辦事宜交付勒保
德楞泰卽赴楚協剿所見甚是前因楚省賊數較
多曾經諭令德楞泰於剿辦川東賊匪將次完竣
時酌量情形前赴湖北協同剿捕今德楞泰未經
接奉諭旨見川省餘賊無多既能統籌全局無分
畛域且並不拘泥前次分界督剿之旨帶兵過楚
正與朕意相合深得大臣公忠體國之道殊屬可

嘉著賞給四喜白玉搬指一個珊瑚豆黃瓣大荷包一對小荷包四個以示獎勵現在湖北冉井二逆據吳熊光派孫應奉帶兵堵剿今尙在興山歸州一帶游奕德楞泰自川赴楚必由該處經過卽當順道先將二逆剿淨再赴竹谿一帶協剿樊樵王曾等逆楚省賊匪中樊人傑爲積年老教最爲狡惡務須上緊設法將該匪速就殲除餘匪自可

漸次廓清可消伏而未起之患至賽冲阿在川剿捕既屬得力自當仍令帶領原兵歸德楞泰一路赴楚至川省搜捕事宜俱係勒保專責毋論川東川北何處有賊皆當上緊殲除現在張魏餘匪雖經派令豐紳劉清等帶領兵勇搜捕但該處界連陝境苟宋二逆輾轉奔竄難保其不由棧回川與之合夥勒保當飭令將弁等分投防堵毋再令苟

逆等竄入川境爲要再川省各峒寨民人前此賊
匪竄擾時祇能爲堅守之計今賊匪屢經大兵痛
剿已屬無多勢極殘敗勒保應出示曉諭寨勇等
倘遇賊匪經過時當各奮勇剿殺不可徒知保寨
自衛任聽賊匪經過庶殺一賊卽少一賊於搜捕
更爲有益

上又命軍機大臣傳諭吳熊光全保長齡曰此次王

曾樊崔等逆分爲兩股由朱家溝桐柏溝向西奔竄經孫清元吉林泰帶領兵勇奮力追剿共殲擒賊匪三百餘名所辦尙好該賊匪屢經剿敗遇見官兵尙敢蜂擁迎撲恃險負隅擲石如雨可見賊匪怙惡不悛勢尙兇悍斷不肯出而就撫惟有痛加剿殺以期早獲巨憝安輯地方不可稍有鬆懈現據德楞額奏稱川省已無大股之賊而楚省賊

勢較重已將川省搜捕零匪事宜與勒保會商派員辦理勒保在彼督催德楞泰卽親赴楚省協剿可見德楞泰於剿捕事宜尙能不分畛域朕早知其辦完川匪之後必卽移師赴楚今德楞泰於川省零匪尙在未竣已慮及楚省賊勢較重先其所急督兵前往其隨同赴楚之賽冲阿溫春蒲尙佐等俱係向來帶兵得力之員並原帶馬步官兵聲

威壯盛自當所向克捷此時楚省大兵俱專注樊
崔王曾股匪其在興山歸州一帶游奕之冉井二
逆僅派孫應奉蔣觀濤二人前往剿辦伊等雖皆
副將大員但兵力較單恐不甚得力已降旨德楞
泰令其率領大兵先赴興歸一帶將冉井二逆悉
數殲除再移得勝之師探剿樊崔王曾等逆設德
楞泰未到之先冉井股匪業已剿淨吳熊光卽星

速知會德楞泰囑其徑往竹山竹谿專辦樊崔王
會等逆以期一鼓集事

同日

上諭內閣曰川省各州縣民人誼切同仇情愿續輸
津貼銀兩以備賞需之用甚屬急公可嘉當卽降
旨令勒保查照上年恩旨再將應徵地丁錢糧奏
請分別蠲免現據勒保覆奏並開列清單進呈所

有此次捐輸津貼銀兩較多之溫江新繁郫縣灌
縣彭縣崇寧崇慶什邡仁壽安縣綿竹宜賓富順
南溪永川江津榮昌綦江南川銅梁大足璧山三
台中江遂寧樂至安岳郫州犍爲榮縣威遠大邑
瀘州等三十三州縣著加恩蠲免地丁十分之三
其華陽簡州漢州資州內江資陽井研慶符長寧
高縣筠連興文屏山敘永廳巴縣射洪鹽亭蓬溪

彭山丹稜青神樂山崑眉洪雅夾江邛州蒲江合
江江安雅安天全名山榮經等三十三廳州縣著
加恩蠲免地丁十分之二成都雙流金堂新都綿
州德陽馬邊廳珙縣隆昌永寧新津合州酉陽秀
山黔江彭水石柱廳江油渠縣彰明營山蘆山岳
池鹽源會理等二十五廳州縣著加恩蠲免地丁
十分之一以示獎勵至川省辦理軍務經朕節次

頒發帑銀源源接濟原可無藉民力現在大功將
次告蒧一切善後需用之項均屬充裕除此次續
輸津貼銀兩業已加恩分別蠲免外嗣後該省民
人無庸復請捐輸並不得再有津貼名目該督應
飭令地方官一體稟遵毋得藉端滋擾

臣等謹案國家以兵衛民一切芻茭楨幹之
儲不能不資乎民力我

皇上子愛閭閻爲民藏富計三省用兵以來各路所用餉銀多至十千萬有餘悉

頒自內帑絲毫不以累民實從古所未有今川省民人義切同仇偶有懇輸津貼銀兩之事仰蒙渥沛恩施

諭令勒保查明捐輸地方寬減租賦酬其急公且申禁嗣後不准再有捐輸及津貼名目所由民無擾

累不數年而保聚休息共沐

深仁之煦嫗也

同日惠齡奏言查宋逆等匪已竄平木等處慶

溥帶兵追剿離棧已遠

臣

撤出棧道寶雞郿縣

一帶趕緊趨行於初十日馳抵黑水峪據報劉

逆賊匪零星散竄總在黑水峪以東撈峪以西

老林內游奕總兵楊芳現在山內搜捕

臣

竊計

劉逆賊匪爲數本屬無多特以零星散竄或東或西牽綴官兵苟延殘喘若以大隊官兵東追西逐徒勞兵力難期得手必須將零星賊匪逼歸一處方可聚而殲擒當飛飭楊芳顧住東面向西轟擊隨搜隨進務將該匪等逼歸一處再行分兵四路兜圍以免受其牽綴茲據探報該匪等見官兵轟逼緊急漸次歸併約有百餘人

在甘峪內之土關子黃草坡一帶藏匿

臣聞信

卽刻拔營星馳趕至甘峪口派兵搜剿詎該匪

屯聚土關子之極高山梁遙見官兵前來又復

零星四散逃向鳳凰山一帶老林

臣

恐其乘夜

潛遁一面飭知楊芳派撥兵勇四百名在南山

黑龍溝埋伏又派兵勇四百名分在東面百丈

礪沙窩子埋伏楊芳自行帶兵在西面鐵爐岔

一帶策應

臣

又派撥軍標官兵三百名在東北

殷家坡紙坊一帶截剿督標官兵二百名在西

北黑虎店堵禦四路俱有官兵兜圍諒該匪不

能遠竄

臣

正在籌布間忽據探報西面野牛河

尙有一股零匪三十餘人在彼滋擾當經楊芳

派令把總田有年秦繼昌分兵前往搜捕趕至

水洞溝老林擊斃賊匪十餘人餘匪俱從石崖

滾落跌斃甚多逃脫無幾田有年等現仍尋蹤

搜捕臣督飭楊芳嚴催各路兵勇合力兜圍先

將劉逆股匪殲除淨盡再行搜捕零星之賊至

苟文明賊股又由太白山老林連夜遁往南面

華陽一帶其宋應伏等賊股亦由王家塆平洛

河竄往華陽於初七日同竄至某子坪經提督

楊遇春截殺殲斃賊匪二十餘名生擒八名搶

獲旗幟六面騾馬十餘匹該匪又折回月亮坪
蒼耳崖等處楊遇春緊跟追剿又於初八九等
日連接三仗擒斬數千人刻下經畧額勒登保
督率扎克塔爾格布舍等由東路九尺壩截殺
副都統慶溥總兵劉瑞等由西路二郎壩兜剿
兵力會合賊勢不能蔓延自無難尅期殄滅
同日陸有仁奏言連日復據探報苟逆大股賊

匪前竄至桃川一寨因偵知經畧額勒登保官兵已在西路截擊仍復折竄洋縣華陽核桃壩等處經楊遇春帶兵趕到設法轟擊擒斬數十人賊隨向月亮坪奔入老林現在額勒登保由小王澗一帶抄截楊遇春卽自九尺壩進兵以期兩面截擊其慶博所追之小股賊匪已在華陽與苟逆竄歸一處慶博等自可協同楊遇春

等併力進剿又劉逆小股之賊尙在盤屋郭縣

山內零星分竄總兵楊芳等帶兵搜洗督臣惠

齡已自寶雞移回盤屋峪口一帶防堵又川匪

一股前從梳子巖堵剿出境旋復乘夜偷竄至

寧羌老龍池擾及寬川大路慶成帶兵趕到兩

次截殺殲斃數十人生擒賊目周良玉餘匪竄

入畧陽復經兵勇搜捕現在止存十數人卽日

自可淨盡又湖北賊匪一股約二千餘人竄至

竹谿之簡家店一帶逼近陝省平利邊界

臣飛

咨總兵穆克登布喜明等就近探蹤堵截並札

飭地方官鼓勵寨勇協助官兵嚴密防範所有

各路糧餉

臣

督飭地方官並各路糧員隨地隨

時不避艱險設法源源運供未敢稍有缺誤至

餉銀一節前蒙

聖恩賞撥山西河南兩淮長蘆共餉銀四十萬兩俾
資接濟計自正月以來晉豫兩省及長蘆餉銀
共三十萬兩陸續解到以之酌量緩急分撥供
支僅敷二月中旬各營緊要之用其二月下旬
以後係暫將山東省協甘例餉十七萬餘兩留
存應用仰祈

俯賜籌撥均奏入

上命軍機大臣傳諭惠齡陸有仁曰惠齡奏劉逆零
匪東西奔竄只有百餘人現在惠齡督同楊芳分
派兵勇四面兜圍以一千二百餘衆之兵力圍剿
百餘名敗殘散竄之零賊豈猶有不能迅速撲滅
之理惠齡等惟當嚴催兵勇奮力搜擊勿任免脫
一俟辦竣即可將楊芳等兵力騰出前赴額勒登
保軍營隨同幫剿苟宋二逆惠齡亦可專力在山

外堵截以剿迅掃餘氛將陝境先行肅清又陸有
仁奏探明各路剿賊情形與各處節次奏報俱屬
相符至湖北有賊匪二千餘人由竹谿之簡家店
一帶竄近陝省平利邊界陸有仁卽飛咨穆克登
布喜明等探蹤堵截並札飭地方官鼓勵寨勇協
助官兵嚴密防範所辦甚是再該省餉銀不敷支
發懇請賞撥一節陝省前撥餉銀尙有淮餉十萬

兩未經解到茲朕又令兩浙於商捐等項下撥銀四十萬迅速解交陝省備用共有五十萬兩除歸還甘省例餉十七萬外尙有三十餘萬兩現在薛大烈一路大兵業已回川陝省客兵日減一日供支自日漸減省陸有仁當督率局員撙節支用俾源源供運毋至稍有缺誤爲要

上又命軍機大臣傳諭阮元延豐曰現在大功將次

告嚴陝省一切善後事宜需費較多著於浙省本年商捐項下撥銀四十萬兩解交陝省備用如商捐銀兩一時未能足數卽著阮元於關稅項下湊成四十萬兩飛飭委員徑解陝西交陸有仁收貯備用